



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8



Ahmedabad nung PM Modi-i electric gari 'e-VITARA' tenzüksü



Leeds-i Leicester full-back Justin alizükogo

VOL. XXII ISSUE NO. 313 (ADOK 313)

DIMAPUR

RASEMNÜ (WEDNESDAY)

LUROI (AUGUST) 27, 2025

₹ 5.00

Chief Justice Kumar-i Naga nunger obendangba yimya tushi

Kohima, Luroi/August 26 (TYO): Mongulbarnü Gauhati High Court indang Chief Justice, Justice Ashutosh Kumar-i Nagaland indang customary justice system nem tenüngsang agütsü, kong tangatetep kati arudaktsütsü meranger, koba 'formal judicial process' den khenyongi meputep, kong aiben takoker aser tamakoker sangdongba nung rangloker.

Kohima Bench semdangba mapang High Court Bar Association (HCBA) Nagaland ajanga pa agizükba sentong ka nung jembidang, state nung mangatetep bentetba yimya nung tashi balaka lir, ajisüaka constitutional provisions den lirumedema alitsüla, ta Justice Kumar-i ashi.

"Nenok yimya agi jungshitepba nung amanger, koba obendangba indang tanüla ka amai lir," ta pai ashi.

Judiciary tashi ya Bar indang tashi dak keta lir, anungji ochi wazüka ayutsüla, lanur advocates tem len anitsüla aser legal system tashi itshtisüla, ta Chief Justice ajanga ashi.

Iba sentong nung High Court Bar Association Nagaland ajanga Justice Kumar nem Guahati High Court nung state nungi representation shidak maliba indang tebilemtsü lemsatepa liasü.

Judges 24 aliba nung Assam nungi 18, Mizoram nungi asem, Arunachal Pradesh nungi ana aser Nagaland nungi ka - Justice Yarenjungla Longkumer - dang

lir. Bar nungi aser judicial service nungi Nagaland nungi judges timba shimtsü HCBA-i Chief Justice, Guahati High Court dang ajungshia liasü.

State nung registered advocates 264 aliba nungi asem dang Senior Advocates lir, anungji langa aliba lawyers timba agizüksü Association-i ayongzüka liasü.

HCBA Nagaland ajanga Chief Justice dang state atema High Court balaka amenoktsü asoshi yaritsü ajungshia liasü.

Hombarnü Nagaland Angh tasenba Ajay kumar Bhalla tenangzüktep agiba sülen pa state nung amungdang, Justice Kumar-i tang teyangludak Kohima High Court complex semdanga liasü, koba structure bo shilem 95 shi renemogo ta ashir.

Iba mapang pai senotsü yari nüngdakbatem bendena tekeraba nung iba ki amshi tenzüksü ashi.

"Yanglua aliba kecha meraksatsü, saka sen aliba yari yangluloka aotsüla," ta ashi.

Mapang talangka nungi Nagaland atema High Court balaka meshiba dak sendakba nung, ibai yimten yimsüsür temi telemtetba agitsüba dang lir, ta Chief Justice-i ashi.

Ajisüaka iba ama telemtetba ka magi tashi Kohima Bench nung nüngdakba ajak peritsütsü asoshi pai reprangtsü ta ashi.

Iba sentong ya HCBA Nagaland tir C T Jamir lenisüba kübok agi, kong judges, senior lawyers aser Nagaland Bar züngsemtem dena liasü.

Osangbener kaji tetsübo makai pa mapa shidak inyakdaktsütsüla: MPC

Dimapur, Luroi/August 26 (TYO): Osangbenertem pei mapa inyakba mapang amokmerenba mesüra merenshia amshiba asoshi Mokochung Press Club (MPC) ajanga tebilemtsü lemsatepa liasü.

Tebang o agia süang mesüra danga yimya balala agia süang, iba ama inyakyim yagi osangbener mezüngmeshiba kisüng masü saka 'freedom of press' amokmerener.

August 23, 2025 nü senden ka alidang Deputy Chief Minister Y. Patton-i yimjak nung Hornbill TV reporter ka artsüba aser iba sülen pa temeden bushia jangjashitsüba atema temulung nung anisüngzüik mali, ta MPC ajanga ashi.

Inyakyim nung mangatetep adoktsü akok, saka tsübodaktsütsüsa inyaka itemji bentettsü merangba ya democracy lima ka nung khenyongi magizükteter. Iba ama mangatetep ya podium nungi masü saka tim yimya nung aser

'institutional channels' shidak amshia angatetteptsüla.

Asüngdangyatsü, jangjashitsü aser tetsübo makai osang abentsü ya osangbener ka temeden aser teinyaktsü lir. Osangbener ola madokdaktsütsü mesüra nokdangtsü merangba ajanga iba mapa nung timtem agütsüba kisüng masü saka nüburtem indang 'fundamental right to information' nunga timtem agütsür, ta MPC ajanga ashi.

Kasa mapang pei mapa ochi nung tasü ita aser shidak inyaktsüji osangbener ka teinyaktsü lir. Anungji MPC ajanga nisung ajak dang osangbener akumtsüboa amshitsü ayongzüker aser democracy tajung ka inyakyim nung tetsübo makai indang-indanga osang abenba nung atsi-anem akatsü mali. Ozü züngsem nem timtem agütsütsü mesüra tsübodaktsütsü merangba nung onoki maneni lungjemer nokdaktsü, ta MPC sangdong ajangasa ashi.

Kohima nung septic tank ayong nung mesüoktsüba nokdangtsü



NLA Committee on Environment and Climate Change mendenpuba MLA Achumbemo Kikon, Committee züngsem Advisors Zhaleo Rio, Hekani Jakhalu Kense aser Z. Nyusitho Nyuthe nungeri Mongulbarnü Kohima nung osangbener den jembidang tangokba noksa ka yangi angur.

Kohima, Luroi/August 26 (TYO): Tanü Nagaland Legislative Assembly (NLA) Committee on Environment and Climate Change aser Kohima nung aliba lokti tentet balala lungjemer ayong aser nullah tem nung septic tank indokba nokdangtsü telemtetba agiogo aser Kohima municipal jurisdiction kübok colony balala nung cesspool aser sanitation gari senzütettsüsa lenmang lapoktsütsü renem.

Committee chairman aser MLA Achumbemo Kikon mendenpuba sür NLA Committee on Environment and Climate Change ajanga Kohima Municipal Council (KMC), Kohima Chamber of Commerce and Industry (KCCI), Kohima yimtiba nung wards/colonies 19 nungi lenirtem, Deputy Commissioner Kohima aser Municipal Affairs department nungi ketdangsürtem shisadokden senden ka Assembly Committee room nung amendang iba telemtetba ya agia liasü.

Senden temer osangbener den jembidang, tenokdangba kecha makai ayong tem menenba anendaktsütsü aser Kohima nung colony temesü nungi jana bendentettsü asoshi iba mera ya kanga tongtipang lir, ta Kikon-i ashi.

"Tang nungi tenzüka, kibong mesüra nisung shinga nema ayong nung septic waste mindokdaktsütsü. Kasa mapang colony tem nung cesspool gari tem senzütsü aser meyipshitsü asoshi tesem tesadem yutsütsü, aji asünung dang jana bendenba maparen tajungba nung inyaktettsü," ta pai osangbener dang ashi.

Senden nungya Meriema village nung aliba faecal sludge treatment plant aser Lerie Colony nung aliba recycling and segregation centre tanaben activate asütsü pangjem, koba sorkari rongsen jenti indoka yanglu saka tang tashi mapa meinyaki lir.

Tsünglanglen ayong tem menenba tebilemtsü lemsatepba mapang, Kohima nungi plastic

aser bottle tem Wokha district nung aliba Doyang ayong nung yimoka anasa aliba tesemtem menenba indang Kikon-i ashi.

"Kohima müreka mayu tashi, asen jana tem danga jila aser ayong leni prokshidaktsütsü," ta pai ashi.

Pai shisa aoba aser maoba jana tem kanga junga bensatsü aser iba inyakyim nung nüburtemi amalitep akatsü ayongzüka liasü.

"Kohima-i tatishitsü tajung sayutsüla. Jana ya rongsen kumdaktsütsüla. Aser iba maparen takok angutsü asoshi nüburtem nem angatetdaktsütsü tongtipang," ta Committee chairman ajanga ashi.

Osangbener den jembiba mapang Committee züngsem Advisor, Urban Development & Municipal Affairs, Zhaleo Rio; Advisor, Industries & Commerce, Hekani Jakhalu Kense aser Advisor, New & Renewable Energy and Nagaland State Disaster Management Authority (NSDMA), Z. Nyusitho Nyuthe nungera liasü.

Dept. of School Education-i tim masüba mapa inyaker: JKM

Dimapur, Luroi/August 26 (TYO): Department of School Education ajanga August 22, 2025 nü tesayurtem transfer aser posting atema sangdong agütsüba nung tezü atangba aser tebilemtsü akaba indang Japukong Kaketshir Mungdang (JKM) ajanga lemsatepa liasü.

Iba dak sendakba nung Ao Kaketshir Mungdang (AKM) ajanga tebilemtsü shidak lemsatepba nung onoka dena lir, ta ashi.

Japukong tsükong telungzüik kisüng nunga government school tem nung maneni tesayurtem agi kanga anünger, aser iba yongji classes agiba nunga timtem ajurur, tesayurtem nem khuret tali agütsür aser academic tsütsü tashi maitba akumer, ta JKM ajanga ashi.

Talisa yimdak-yimtsüngtem

nung iba tensa ya tamajungba lir, kong kaketshirtemi angazüksü maongka tatakzüik ka dang yutsür, anungji yimyak-yimtsüng aser jila balala nung shisaliok tsütsü tepila tuluba kumdaktsür. Iba ama senzüka yutsüba ajanga kaketshirtem züngyonga aotsüba nung timtem agütsüba kisüng masü saka timtem balala arema tajungtiba nung tanurtem anitettsü merangba tesayurtema temulung ajemdaktsür, ta ashi.

Shisaliok ya kaketshir tiyong südaktsütsüla aser kechi policy südir süaka tanur ajak nem shisaliok tajung aser kasa agütsütsü nükjidong nung yanglutsüla. Nisung kar bhusemba, pei jangraba ama inyakba mesüra administration tashi maitba ajanga ozü kaketshir tarutsü tia meyangludaktsütsü, ta JKM ajanga ashi.

AKM ajanga toyuyuba agüja aliba ama, tesayurtem agi anünga aliba school nungi tesayur nem release orders magütsütsüla, tesayur tali aliba school tem dangi yokba tesayurtem indang joining report magizüksüla, ta parnoki ayongzüik.

Sorkar school tem inyakyim tarutsü nung tamajungba mekumdaktsütsü asoshi iba mera ya tongtipang lir, anungji nüburtem, kaketshir tentet aser civil society organizations ajunga dang asen kaketshir nem shisaliok tajung agütsütsü temeden wazüka ayuba nung teka amteper nokdaktsü ayongzüker. Terenlok asoshi shisaliok ya tamendak dak lir, aser asenok lungjemer tanur shinga indang temeden merakzükdaktsütsüla, ta JKM sangdong ajanga ashi.

CMHIS-i National CIPS Innovation Award nguogo



Jammu & Kashmir Lt. Governor, Manoj Sinha-i, Dr. Kika Longkumer, Joint CEO, aser Dr. Yingnei Kongyak, Deputy CEO na nem CIPS Award 2024 agütsüba noksa nung angur.

Dimapur, Luroi/August 26 (TYO): Nagaland sorkar indang flagship health initiative, Chief Minister Health Insurance Scheme (CMHIS) nem Health Sector nung CIPS Innovation Award 2024 agütsüogo.

Iba award ya Jammu & Kashmir Lieutenant Governor Manoj Sinha-i August 22 nü Srinagar, Jammu & Kashmir nung sentong ka agiba mapang agüja liasü. Nagaland Health Protection Society (NHPS), Department of Health & Family Welfare tenüing nung Dr. Kika Longkumer, Joint CEO, aser Dr.

Yingnei Kongyak, Deputy CEO nati iba naroküm agizüka liasü.

Senotsü tsütsü risk aliba nungi kümzüka healthcare dalang, ajaki agitetsü aser tebandang makai agütsütsü atema state atema CMHIS tenzüka aser iba ajanga technological innovation, social inclusion, aser financial sustainability longjemdaksür.

Tebendang makai ajak ayimjemtsü atema inclusive coverage model Digital enrolment, cashless services, aser real-time claim processing meyokteper CMHIS yagi public health governance nung

nükjidong tasen ya amenoktsüogo aser iba ya Universal Health Coverage atema India nükla aliba tongtetsü asoshi jenjang ka agiba lir.

Sentong yanglurtem, administrators, partner agency tem, aser frontline health worker temi anibelem mesasai inyakba ajanga iba naroküm ya agizükogo. NHPS-i, ken o dak sendaka alir aser Nagaland nung aliba lisopur ajak dang iba scheme takok asoshi nongita yariba atema kanga pelaba lemsatepogo.

Pensioner tem life certificate benoktsü metetdaksür

Dimapur, Luroi/August 26 (TYO): Senior Treasury office Mokokchung nungi pension agizüka aliba pensioner ajak dang teküboklen agüja aliba anogotem nung pensioner Association office Mokokchung nungi renew sür aliba identity card 'D' den life Certificate aser pension payment order book (PPO) benoktsü metetdaksüogo.

Life certificate ya Senior Treasury officer Mokokchung nungi mapa inyakba anogo ajak nungi agizüktetsü, mesüra department indang website <http://treasuries.nagaland.gov.in> nungi download sütettsü.

Agüja aliba anogotem nung

tenüingdakba kuli kakettem mebenokra pension magütsütsü. Central Treasury Rule no-367and 360 (IV) dak ajemdaker pensioner tem taküm ali mali jangjatsü atema iba inyakyim ya benoka inyaker, ta kasa sangdong ajanga metetdaksü.

Sept. 15, 2025 (Hombar) : Tsusapang Sungkumen Ward Tongdentsungyong War Alempang Ward Alongmen Ward Kapayong Dilong Ward
Sept. 16, 2025 (Mongolbar) Sangtemla Ward Penli ward

Majakong Ward Artang Ward Marepkong Ward Lichaba lijen Ward
Sept. 17, 2025 (Bodhbar) : Mongsenbai ward Kumlong Ward kichutip ward Salangtem ward Arkong ward Aongza ward
Sept. 18, 2025 (Brehostibar) Ongpangkong Range Yimyu ward
Sept. 19, 2025 (Hokolbar): Asetkong Langpangkong Jangpetkong Tsurangkong Japukong Range.

DGC nung Beautician Crash Course ka tenzüko



Dimapur, Luroi/August 26 (TYO): Dimapur Government College Skill Development Committee-i ayongzüka August 26 nü 2:30 ako nung Room No-18, Arts Block nung Beautician Crash Course tenzüka sentong takok ngua agiogo.

Cosmetology luyim nung kaketshirtem nem practical skill agütsütsü atema iba course ya tenzüko, koba Department of Higher Education, Nagaland-i sponsor süa liasü.

Sentong ya department of

Hindi nungi Assistant Professor Taba Yasi lenisüba nung agi. Sentong ya mendenbulai lokti pela agizükba o jembir tenzüka aser iba sülen Dr. Maongkala Longchar-i iba program idang tatsü agi metetdaksü.

Sentong nungsa nungtugu Makeup Artist aser Trainer Hukali Avito Swu-i o tatsüka jembir aser lai shisatsü tajung agütsüba den sentong nung shilem agirtem ajungmesoa liasü.

Sentong ya department of

Psychology nungi B.A. 1st Semester kaketshir Elizabeth Chongloi-i tepela o jembir tembang, shibai sentong takok asoshi teyari agütsürtem aser shilem agirtem dang pelaba lemsatepa liasü.

Iba course amenokba ajanga Dimapur Government College nung skill development aser vocational training dak sendakba nung alizüing tasen ka tongtetba sayur, aser iba ajanga taruba crash course asoshi kaketshirtem kanga jangrabangra kümdaksüogo.

Social Welfare Dept-i AWC tem asadangtsü

Dimapur, Luroi/August 26 (TYO): State kübok tesem balala nung Anganwadi Centres (AWCs) tem aika nung enrolment kanga ajema aliba aser junga inyangsangshi masüba Poshan Tracker App ajanga jangja akümba sülen state nung Anganwadi Centre tem ajak performance Assessment ka agitsü ta Department of Social Welfare-i metetdaksüogo.

Iba asadanga sentong benoka inyakba sülen junga inyangsangshi masüba AWC tem kanga junga

asadangshitsü aser temsüa aliba tesemtemi belener aotsü.

Department-isa, lokti tentet lenirtem aser local ketdangsurtem dang iba inyakyim benoka inyakba mapang teka amteper inyaksü aser Aadhaar Enrolment/ updation inyakyima nongita yaritsü mepeshia metetdaksüogo, ajita asünungdang Anganwadi service ya temsüa alir aser langa aliba beneficiary tem tonga bener otettsü.

Temjenmenba-i Chungliyimsen nung Odangba Memorial Ki semzüksü



Advisor & MLA Temjenmenba-i 'Odangba Memorial Ki' semzüksüba sülen tangokba noksa nung angur.

Chungliyimsen, Luroi/August 26 (TYO): Advisor for Transport and Technical Education, MLA Temjenmenba-i, 29 Jangpetkong Assembly Constituency kübok Chungliyimsen nung tawa yangluba community ki August 23 nü semzüksüogo.

Ki tasenba ya office-cum-guest house asütsü aser "Odangba Memorial Ki" ta jatsüogo. Iba ki ya LADP fund agi yanglua liasü.

"Tanü ya ni aser ozü kibong atema dang masü saka Chungliyimsen nung aser asen tamangba puti otsü meima kümzüka aser anepalua ayurtem ajak atema tongtibang anogo ka lir. Asenok asür Odangba nem tetushi agüja Odangba Memorial ki semzüksü nokdanga lir, shiba Chungliyimsen Baptist Church

(1903-1905) nung mezüngbuba Pastor liasü, shiba küba lir," ta MLA Temjenmenba-i ashi.

Pai, Odangba ya tongmelang nisung ka, shibai pa tamangba nungi masetshi-i nokdaka nüburtem ajemalua aser temeim agi tenzüko, ta ashi.

Pastor Odangba-i, Tsüngrem dak tamang tamendakdak azünga toktsü aser iba ajanga tanüa maneni len anir, ta ashiba den Temjenmenba-i, iba ki ya Pastor Ondangbai bendanga agüja tenzüka aser Tsüngrem akümtsüba temaitsü lir, ta ashi.

Sentong nung NCRC, Chungliyimsen pastor-i Tsüngrem temaotsü meshizüka sarasadem aser Chungliyimsen VC Chairman, N. Yanger Imchen-i lokti pela agizükba o jembia liasü. Sentong nungsa Watsu Telen Chungliyimsen-i ken tajung ka tena liasü.

Kohima DC-i gari senzügenpongtsü tetuyuba agütsü

Dimapur, Luroi/August 26 (TYO): Kohima Deputy Commissioner, B. Henok Buchem, NCS-i sangdong ka ajanga, Kohima jila nung gari senzügenpong tajungba achayangtsü asoshi commercial taxis tem anogoshia anepdang 9 ako nungi nikongtsütsü 5 ako tashi Lower PWD Junction nungi ir Oking Hospital anasa Middle Midland Junction nungi adoktsü memelatsü, ta metetdaksüogo.

Nüburtem tejangraba apir iba tetuyuba agütsüogo aser nüburtem dang iba inyakyim takok ngua benoktsü atema takokba tashi teka amteper inyaksü mepeshia

Tanga tetuyuba ka ajanga Deputy Commissioner-isa, Kohima jila nung lenmang tezülen gari mashi mashi anenba ajanga gari senzügenpong nung tetsükdaksü adokba tajungba azüoktsü asoshi Jail Colony, Ward-19 nung Fira Hotel nungi Assamese Church tashi lenmang ya anogoshia "No Parking Zone" asütsü ta metetdaksüogo.

Tetuyuba sülen manidakba garitem pur aotsü aser Motor Vehicles Act, 1988 kübok Section 179 dak ajemdaker merenshitsü, ta kasa sangdong ajanga metetdaksü.

Ahmedabad nung PM Modi-i electric gari 'e-VITARA' tenzüksü



August 26, 2025 nü Ahmedabad nung Ato kilonser Narendra Modi aser Suzuki Motors Tir, Toshihiro Suzuki nati Maruti Suzuki indang mezüngbuba electric gari e-Vitara tenzüksüdang tangokba noksa nung angur.

Ahmedabad, Luroi/August 26 (Agencies): Mongolbarnü Ahmedabad kübok Hansalpur nung Ato kilonser, Narendra Modi-i Suzuki indang mezüngbuba Battery Electric Vehicle (BEV) 'e-VITARA' tenzüksüogo.

Iba sentong nungji Suzuki Motors Tir, Toshihiro Suzuki-a liasü.

Made-in-India indang BEVs garitemji Japan aser Europe nung aliba linüktem densema linük 100 dak tema dangia yoktsü. Tang iba alizüing

tongtetba ajanga alima nung Suzuki-i electric gari yangluba tiyongtsü tesemji India akümtsü.

Ato kilonseri 'Make in India' aser Aatmanirbhar Bharat ajungkettsütsü merangba mapang ka nung India nung BEV gari yanglua sayar.

Ato kilonser Modi-isa Gujarat nung aliba TDS Lithium-Ion Battery plant nung hybrid battery electrodes tenzüksütsü.

Iba plant ya Toshiba, Denso aser Suzuki senteper amenoker. Iba plant ajanga linük nung

manufacturing aser clean energy innovation ajungkettsütsü. Alima nung iba battery shilem 80 shibo India nung yanglutsü.

Hombarnü Ato kilonser Modi-i Ahmedabad nung sen crore 5,400 shi indang terelok project aika tenzüksüogo. Pa Ahmedabad tonga aoba sülen road show agia liasü.

Hombarnü lokti den jembidang Modi-i linük tesem balala nung tüzümsüing lendong nung asürtem atema mangyim jashi lemsatapa liasü.

Jammu & Kashmir nung anentsüh lendong nung nisung 5 asü

New Delhi, August 26 (Agencies): Mongolbarnü Jammu & Kashmir nung Reasi district kübok Trikuta hill nung anentsüh lendong nung nisung pongu süogo.

Mata Vaishno Devi tekülem kidangi atuba lenmang nung anentsüh aluba lendong nungjisa nisung 14 yiru, ta ketdangsertemi metetdaksü.

Shri Mata Vaishno Devi Shrine Board-i X ajanga, "Adhkwari nung Inderprastha Bhojnalaya anasa anentsüh lendong atalok. Sepaitemi kümzükba maparen inyakdar," ta metetdaksü.

Tenem nung aliba tekülem kidang jagi atutsü atema temeshi ainlen jajartermi kilometer 12 shi jajar. Lenmang tom nung anentsüh aluba sülen temeshi ainlen jajaba thinenogo.

Jammu & Kashmir nung anogo asemnü tashi tzünglu maneni aruba ajanga tesem aika nung tüzümsüing tensa lir. Iba tensa asadangtsü atema

Mongolbarnü J&K Chief Minister, Omar Abdullah leniba nung tongti ketdangsertem senden menogo.

Tzünglu maneni aruba agi ketdangsertemi temeshi ainlen jajaba nokdangogo. Ajisüaka nikongdang 1:30 tashibo temeshi ainlen jajartermi tekülem kidangi tua liasü.

Tzünglu maneni aruba agi train 18 thinen aser train services ji teimbaka Katra nungi senzüba train tem lir, ta ketdangsertemi metetdaksü.

Chakki ayong nung tzü tali metsünga ayimba agi ayong tsünglanglen Pathankot Cantt (PTKC) aser Kandrori (KNDI) na tsünga train lenmang raksa.

Tesem aika nung anentsüh aluba sülen Jammu-Srinagar National Highway-a nokdangogo. Ramban district kübok Chanderkote, Kela Morh aser Battery Cheshma nungbo tenemlen nungi lunga tulu aika alua liasü.

Udhampur aser Qazigund

tsünga gari lenmang mokdangogo. Kishtwar kübok Padder lenmang, Ramnagar-Udhampur aser Jangalwar-Thathri lenmangtem-a shibangogo.

Kathua district kübok Sahar Khad ayong tepdanga yangluba apu ka chirep aser Jammu-Pathankot Highway-a mokdangogo.

Mongolbarnep Doda district nunga tzünglu sashia aruba sülen tesem aika nung anentsüh aluba ajanga Jammu-Srinagar highway shibangtsüsa aküm.

Asemnü tashi tzünglu maneni aruba agi ayong aika nung tzü kanga mobanga yimdar aser Ravi ayongkümlen aliba tesem aika tzü agi metsüngbangogo.

Meteorological Department (MET)-i August 27 tashi Jammu aser South Kashmir kübok tesem aika nung tzünglu arutsü, ta tekümdangtsü metetdaksüogo.

Bihar nung voters list nungi voters lakh 65 tenüing agientsü: ECI

New Delhi, August 26 (Agencies): September 1 nü Election Commission-i Bihar nung final voter list sangdongtsü lia EC telung osang ka ajanga Bihar nung voters lakh 65 dak tali züngdoktsüa akok, ta metetdaksüogo.

Bihar nung electoral roll atema Special Intensive Revision (SIR) kanga junga agidar, aser voter list tasenba amshia Bihar assembly election agira voters percentage kanga atutsü.

August 1 nü sangdongba draft voter list nung voters crore 7.24 nungi voters crore 7.17-i enumeration form den documents agüja liasü, ta ketdangser kati metetdaksü.

June 24 nungi July 25 tashi SIR agiba mapang nung voters crore 7.24-i documents agütsü, ajisüaka draft roll nungbo voters lakh 65 shi mali.

Hombarnü election office-i, voters final list ji September 1 nü sangdongtsü aser voters lakh 65 shi tenüing malitsü, ta metetdaksü.

Voters list nungi züngdokba tenüing lakh 65 nungji asürtem lakh 22, tesem melenshiba voters lakh 36 aser tesem ka dak tali nung tenüing agütsür voters lakh 7 dak tali lir, ta Election Commission-i metetdaksü.

Voters final list sangdongba sülen election identity cards tasen den voters noksa tasen voters ajak nem agütsütsü, ta EC-i metetdaksü.

Voter cards tasen nungji tang aliba Electors Photo Identity Card (EPIC) number alitsü ajisüaka voting booth melenshitsüa akok, kechiyong voters sademsadema vote agütsütsü atema state nung polling booths aika bendenlokogo.



New Delhi, August 26, 2025: Ato kilonser Narendra Modi-i Japan aser China na semdangtsü aliba dak sendakba nung Foreign Secretary, Vikram Misri-i osangbenertem senden ayongzüka jembidang tangokba noksa nung angur.

Odisha nung yim 170 tzü agi metsüngbangogo

New Delhi, August 26 (Agencies): North Odisha nung Balasore, Bhadrak aser Jajpur district tem kübok aliba yim 170 dak tali tzü agi metsüngbangogo, aser taruba anogo ishika tzünglu maneni arutsü ta IMD-i metetdaksüogo.

Subarnarekha ayong nung tzü tali metsüngba agi Baliapal, Bhograi aser Jaleswar kübok yim 130 shi tzü agi metsüngbangogo aser Baitarani ayong nung tzü tali metsüngba agi Jajpur kübok yim 45 shi tzü agi metsüngbangogo.

Bhadrak district kübok Dhamnagar aser Bhandaripokhari blocks nunga tesem aika nung tzü metsünga lir. Tzümsüing agi Keonjhar aser Sundergarh districts nunga yim kar kongshiogo.

"Kani ayong nung tzü tali metsüngba agi Jajpur district kanga mejungi kongshiogo. Ni Jajpur kübok tüzümsüing agi kongshiba tesemtem semdangtsü," ta Revenue and Disaster Management minister Suresh Pujari-i metetdaksü.

Item district nung kümzükba aser teyari agütsüba maparen inyakdar, ta pai ashi.

Nisung aika aienshidakja

relief camps nung jenokdaksüogo; parnok nem chiyungtsü agütsüba den külemi kiset shiruru atema-a chiyungtsü lemstsüdar.

Sundergarh district nungbo trailer truck kati Safei ayong nung apu adena aotsü merangdang tzü agi ponger ao aser driver Sujit Aind samar tang tashi mangur.

Indian Meteorological Department (IMD)-i, Mongolbarnep 5:30 ako nung Odisha tzüyümkümlen nungi pilar northwest Bay of Bengal nung low pressure area ka tentetogo aser ibaji west-northwest tsütsüleni aotsü. Ibaji ajanga ano anogo pezünü tashi Odisha tesem aika nung tzünglu arutsü, ta metetdaksüogo.

"Balasore, Bhadrak, Jajpur, Kendrapada, Cuttack, Jagatsinghpur, Puri, Khurda, Sundargarh, Jharsuguda, Bargarh, Sambalpur, Deogarh, Angul, Dhenkanal, Keonjhar, Mayurbhanj, Sonapur, Boudh, Nuapada aser Bolangir nung tzünglu aruba den külemi tsüingi kanga bulutsü aser mopung ghonda ka nung kilometer 30-40 tashi kera aontsü," ta IMD osang nung ajemdaker ketdangser kati metetdaksü.



August 26, 2025 nü Jammu nung Jammu & Kashmir Chief Minister, Omar Abdullah leniba nung tongti ketdangsertem senden mena tüzümsüing tensa asadangba mapang tangokba noksa nung angur.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 27, 2025

Gaza Nung Ayawara

- Tangsen Lemtur

Ayaba mesüra tzüraba ya meimchir ajaki khenkhenbo ajangshir, ajisüaka Gaza nungbo tesüiba ita aika nübürtem anogo shia aontzü (soup) tera dang jema taküm alibaji shisadangra temeimtsüka lir. Kodang meimchir ka temang nung nüngdakba chiyungtsü peria mechilir tashi lular aser temang nung temo ajema akümer, iba sülen shi tetsü ajema akümtsü aser temang shilem balalai mapa junga meinyaktsü; tesüsabo aya agi süadoker. Tanü Gaza nungbo arrshi küm pongu ser tekübok tanur meyrjang aika den mashisa tetsütem jenti chiyungtsü agi matu okrongtepba tensa kati menepogo. Iba ya meimchirtemi sayangtetba ayawara lir. Tesüiba ita 22 tashi Israel sepaitemi Gaza nung Hamas anema raraa arudar. Ita ishika tejaklen meimchir temeden atema inyakterem, teyari agütsüba organizations aser Khristan melungtet telok aikati Gaza nung ayawara tensa arutsü ta metetdakja aruba ama atangji tanübo Gaza nung ayawara sangdongogo. Gaza nung anogo shia aya agi tanurtem jenti asür. Taoba hopta Integrated Food Security Phase Classification (IPC)-i Gaza nung ayawara sangdongogo, aser iba ya meimchirtemi sayangtetba ayawara lir. Gaza nung kibong pongu shia nungi ka nungbo chiyungtsü agi kanga anünger aser tanur asem shia nungi kabo pok agi matu. IPC-i ashiba agi, iba ama tensa ya menokdangra Gaza nung arrshi küm pongu ser tekübok tanur 1,32,000 dak tali süadoktsü. UN Secretary-General, Antonio Guterres-ia, "iba ya meimchir tamakok ka lir" ta shiogo. UN-i nungitba IPC puti otsü nung (küm 20 tsüngda) ayawara tatalokba pezü dang liasü- 2011 küm Somalia nung ayawara, 2017 küm South Sudan nung, 2020 küm nunga South Sudan nung aser 2024 küm Sudan nung ayawara liasü. Tang tesüsa rara ajanga Gaza nung ayawara lir. 2007 küm nungi Gaza telungi chiyungtsü aser osettsüset bener aiba Israel-i azüoker aser 2023 küm October ita nung Hamas teloki Israel amakba sülen nungibo item tenokdangba ano tesashiba benoker. Taküm March ita nung Israel Ato kilonser Benjamin Netanyahu-i ceasefire tezüngzüktep raksaba sülen Israel-i ita asem jungnüa Gaza telungi chiyungtsü/ osettsüset bener aiba nokdanga liasü. Iba sülen chiyungtsü telatet ka dang bener aitsü melar. Item tenokdangba ajanga Gaza nung nisung meyrjang aika chiyungtsü agi anünger. Iba dak alia Palestine nunger 1,300 shibo chiyungtsü alemba centres nung kasetogo. Israel nükjidongji Hamas meshimeshia samatsütsü aser pua alirtem ajak chioktsü atema liasü, ajisüaka tang parnok inyaksangshi apibo Palestine nunger samatsütsü nükjidong nung inyaker ama aikati repringteter. Israel-ibo Gaza nung ayawara tensa lir ta asübaji tiyazü ta ashir. Ajisüaka taoba ita Doctors Without Borders, Oxfam aser Amnesty International densema telok 100 dak temai shidi ka nung sign süa 'Israel-i metetsümonga Gaza telungi chiyungtsü bener aiba nokdang' ta aitsüogo. Tang iba ama tensa ka nung alima nung Arogotem tangatetba-a makmakshimakdaksür. Atangji Lai tesayuba nung ajemdaker Khristantemi Israel pusemer (moatsür), ajisüaka Khristan lenirtem karibo joko Israel-i Gaza nung ambangyima inyakba aitsü tenzükogo. Tang Eastern Orthodox Arogoi Ukraine nung rara anemabo ola adoker saka Gaza nung rara atemabo ola madoker. Züngsem million 230 aliba Eastern Orthodox Arogoi Ukraine nung rara atema Russia aija arudar, saka Gaza nung rara atemabo Arogoi ola madoker. Eastern Orthodox Arogo nung putir katibo, "Iba ya Khrista tesayuba ama masü. Asenoki Gaza-a pusemstüla, Khristantem mesüra Arogotem ama masü saka meimchir ka ama pusemstüla," ta shiogo. "Gaza nung ayawara ya nisungi sayangtetba lir, anungji iba ya nokdangtsü akok," ta shia IPC-i alima linüktem dang, talisa US dang Gaza nung ayawara nokdangtsü atema tiyongtsüi ia inyaktsü mepishir.

OLEMSABANG

TENÜNGSANG AGÜTSUBA AGI TELONGJEM TALI AKANGSHIR

~ L. Kika Pongener.

(Yashi adok nungi...)

Anungji pai tetsü-i ashiba amaji arem tongli-i "Na nisung tajung" ta ayimoktsü, aser idangji pa dangia aongmetang ola jagi...."Na nisung tajung" ta meyipa langzük. Atangji, aseni kechi ola yoker, iba olaji dang asen dangia meyiptsü....Asenoki tangar takok tajung angudang sadok-sadoka tenüngsang agütsüra, tangar-ia asen mapa tajung nung meyiper tenüngsang agütsütsü. Anungji asenoki mapa tajung nung tenüngsang agütsütsü atsü-ayunga melili.

Ano asenoki Tsüngremi moatsüba nungi asen akaba tajungtiba agi pa nem tenüngsang agütsütsüla. Yisu alima nung alidang, kenu anogo Yisu-i zütsüra aketba nisung ter ajuru, aser parnoki Yisu dang parnok dang aochiang ta ayimten nungji, Yisu-i parnok dak zütsüra keta aliba idangyongjisa aneptsü. Ajisuaka, parnok nisung ter rongnung nisung kati dang meyipa arur Yisu nem tenüngsang agütsü. Anungji Yisu-i parnok nisung ter aneptsüba nungi nisung ka dakji alaka tangar toküjibo kong ali (?)...ta asüngdangba angur (Luke-17:11-19). Atangji, Yisu-ia kanga pelar ta tenüngsang agütsübaji aginur, aser asenok Pa dak amangertem dang nungi aji yimlar. Shirnoki parnok nem moatsüba nungi Tsüngrem dang pelar-a nii....ta tenüngsang tenla agütsür parnok nemji Tsüngremi ano tanaben meyipa talila mola-moshia moatsür. Tenyar Paul-i Tesalonika nunger dangi züluba ama, "Tia ajak nung tenüngsang agüjang, kechiyong nenok asoshi Khrista Yisu nung ya Tsüngremi mulungba lir" (1Tesa-5:18). Tensa tia ajak nung, tetezü....Asenok anema aliba mapang, pelaa aliba mapang, kaa-ita jangratema aliba mapang, asenok shiranga alidang, shisabulu tebilemstü khuret agi nenneter jashia alidang, makamait tia nung timtema alidang, alima nuburi tushia aliba mapang, mesura alima nuburi sentoker tatala aser sensamasa tia nung alidang.... Iba ama tensa tia ajak nungji, asenoki Tsüngrem nem tenüngsang agütsütsüla ta Tsüngrem o-i ashir.

Atangji, asenok tensa tia tamajung nung alidangbo, asenoki Tsüngrem dang kanga pelar-a ta ashitsüji kanga tasak asütsü. Ajisuaka, tenyar Paul-i ashiba ama, tensa tia ajak nung asenoki sadok-sadoka Tsüngrem nem tenüngsang agütsütsüla. Ano asenoki kati ka nem tenüngsang agütsüba ajanga nisung o nisung na tsüngda telongjem, temeimtep aser tesendaktep akanga yanglushir. Anungji asenoki mapa tajung nungbo kati ka nem tenüngsang agütsüdi, mapa tajung inyakba asoshibo sorkar tenzüker, yimsusur, lokti lennir ajunga nem tenüngsang agütsüdi. Asen jala-jabasotem aser asen semchi-semnurtemi sorkar mapa aser company mapa balala nung takok tajung angudang aser shisaliok bushiba luyim nung temaba jenjang nung takok tajung angudang, kija aser lokti-tentet ajaki tenüngsang agütsüdi. Mapa tajung nung kati ka nem tenüngsang agütsüba aser lokti-tentet balalai tenüngsang agütsüba ajanga takok angurtema tali tashi itshidaktsür aser tamakok angur asoshia tarutsü nung tali tajungba meranga inyaktsü ajungshir aser asen lokti nung telongjem, temeimtep aser tesentaktep tali akangshir. Anungji asenoki mapa tajung nung kati ka nem tenüngsang agütsütepba nung atsü-ayunga aser anungakonga melili.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor John MacArthur bilemteta memorial service agi



August 23, 2025 nü California nung aliba Grace Community Church nung asür Pastor John MacArthur bilemtetba memorial service nung par jabaso tambusang, Matt MacArthur-i jembidang tangokba noksa nung angur.

August 26, 2025: August 23, 2025 nü Pastor John MacArthur bilemteta memorial service agiogo aser iba sentong nung par jabaso tambusang, Matt MacArthur-i tebu küm 60 jungnüa Tsüngrem tenzükba wadang nung aliba bilemteta jembia.

California nung aliba Grace Community Arogo nung ghonda ana ser tesadang shia agiba sentong nung Matt MacArthur-i minute 20 shi jembia liasü.

Matt-i, "Talisa kübu akümli tembangtsü anogotem nung pa kanga tasü itta liasü aser tamang jenjang ulushia liasü," ta ashi.

"Obala-i kanga jangjajangja

jembia aser kanga tasü itta liasü. Pa ya kinüngbu tajung ka, tebu tajung ka aser Oboula tajung ka liasü. Pai nükjidong kodanga manokshi. Iba temeshi sabang nung pai molosongzü ama nokdak aser akümli tembangtsü mapang nunga pa tasütait liasü," ta pai ashi.

Matt MacArthur-i, "Kübui kü dang tatembangbuba ashiba oji yamai liasü- 'Jabaso, tamang jenjang tashi itta liang," ta metetdaksü.

Paisa, tebui tenyar Paul-i 1 Korint 15:55-57 nung shia aliba lepshi aser pa tekümtet tejangja aliba lemsatep, ta metetdaksü.

Pastor MacArthur memorial service nung tongti omenji 'Junga Tembangba'

liasü. Memorial program nung iba omenji ajenloka liasü.

MacArthur memorial service nungjisa John Piper, Alistair Begg, Sinclair B. Ferguson aser Joni Eareckson Tada nunger densema Khristan lenir aikati jembia liasü.

MacArthur ya taküm July 14 anogo nung arrshi küm 86 nung asü. Pa tesüiba küm ana tashi pneumonia densema temang nung timtem balala agi shiranga liasü.

Yaküm November 24 nü tatemsa sabang nungi sayutsüngiba mapang nung MacArthur-i pa temang nung menokmein liaka Tsüngrem dang pelaba lemsatepa liasü.

John Fullerton MacArthur Jr. ya 1939 küm June 19 nü Los Angeles, California nung aso. Pa taoba mapang Los Angeles Pacific College (tangbo Azusa Pacific University) nung Bachelor of Science degree angu aser Biola University's Talbot Theological Seminary nung Master of Divinity degree angu.

Pa graduate asüba sülen küm asem lir 1969 küm nungi tenzüka pa Grace Community Church of Sun Valley, California nung pastor aser tesayur küm 50 dak tali inyakogo.

John MacArthur-i pa akümli mapang nung 3,300 ben dak tali sayutsüngiogo aser Khristan kaket aser biblical study guides kaket 400 dak tali züluogo.

ANOGO ABEN TSÜNGREM DEN

Sannüker Nungi Anisüngzük

"Au, ni tasü akhüm ayongküm ajanga jajaaka, ni kecha lendong metsübut्स; kechiaser na kü den lir; ne mechi aser ajok agi ni sünepdaksür."- T.Ken 23:4

Tsüngrem Chir ka ama na kodanga ne kija masü! Ne Sannüker ne den mapang ajak nung alir. Ne tia nung nai kodanga majatsü. Pa kong lir ta na kodanga süngmanga malitsü. Timtem mapang nung Pai na toktsütsü ta na kodanga tsübua malitsü. Pa ne jakdang aor; Pa ne tsütsü jajar; Pa ne sülen anidaker. Pai na kümzüka tongdanger. Pai alushijak shia metetta aliba ama, aser ne kolak nung ku ajak züngtetta ali ama, Pai na teti repranger (Lk.12:6-7). Nai Pa menguaka, Pai teti Pa tenük dak ayur. Tejashi mapang nung Pa tashi itta ne den aliba agi na süneptsür. Pai tasü akhüm lenden ajanga na anir. Pai nai aginüba ama lenden meketa manir. Na am mang lenden ajanga aotsüla ta ne Sannükeri meteta na ibaji ajanga anir. Aji saka na jajaba ajunga nung Pai na meimer aser ne den lir ta tejangja metetdaksür. Tamalen metetba dang nungi iba mapang Pai na meimba tarokba nung metettsü.

Nai tamajung tsübut्स menüngdak. Tamajungbai na metetba dang nungi ne Sannükeri na tajungba metetta lir. Pai tamajung ajak ngua lir aser ajak madak Pai takok ngua lir. Tamajungbai Pa aoksa aputsü makok. Na kodang aser kong timtem ajurutsü ne Sannükeri teti metetta renema lir. Ne Sannüker tajung dak bendanga amangang. Pai na tongdangtsü aser Tammangtiba lenden ajanga Pai na meimba sayutsü.

Maine nung Arogo tentetsang pastor Tshimankinda ICE-i apu



August 26, 2025: U.S. Immigration & Customs Enforcement (ICE) agent temi Maine nung Arogo ka tentetsang Congolese nunger pastor ka puogo; tang pa New Hampshire nung aliba correctional facility ka nung puoka lir.

Pastor Michel Tshimankinda ya 2016 küm March ita nung tourist visa bener United States-i arua liasü aser visa expire süaka maneni US nung alir, ta ICE otongdar kati metetdaksü.

Taoba Bodhbarnü pa puogo, ta ICE-isa metetdaksü.

Pastor Michel ya Democratic Republic of Congo

nung aso. Tang pa New Hampshire nung aliba Strafford County Department of Corrections facility nung puoka lir, ta ICE Online Detainee Locator System ajanga metetdaksü.

Court nung ken o jembidang indokba senotsü nung Tshimankinda'er kibong den yariteptsü atema fund raising campaign ka tenzükogo aser Hombarne tashi nung dollar sen 26,000 dak tali bendenteta liasü.

Pastor Michel'er jala, Jobel Tshimankinda-i, "Kübu apuba ajanga ozü kibong kanga aoksaogo. Tsüngrem taochi

ajanga pa tanaben meyipa arutsü, ta onoki meteta lir. Onok mesütsü atema kübui kanga meranga inyaker. Pa ya temiem kinüngbu ka, tebu tajung ka aser Arogo atema kanga tongtibang nisung ka lir," ta metetdaksü.

South Portland aser Gorham nung aliba Arogotem atema Tshimankinda ya kanga tongtibang lenir ka kümogo. Par kibongi tesüiba küm aika Life Church nung dena liasü.

Life Church nung pastor, Tom Pequinot-i, Tshimankinda-i par kibong rangben US nung jenoka alitsü atema temepishiba agüja lir, ta metetdaksü.

Paisa, "Pa ya Tsüngrem

nisung ka. Pa aser pa kinüngtsü na ochishir, kanga teladak aser par kibongi ajak den par kibong otsü lemsateper," ta metetdaksü.

Tesülen Tshimankinda-i Restoration Church tentet. Iba Arogo ya South Portland nung aliba Promised Land World Outreach Center nung lir.

Pa den külemi inyaksemer Arogo lenir, Paul Roberts-i, Tshimankinda-i March ita nung iba Arogo ya tenteta liasü, aser iba mapang nungjagi tenzüka pai mapang shia sayutsüngir, ta metetdaksü.

Pastor Michel apuba ajanga Arogo nung züngsemtem kanga aoksatepogo. ICE agent temi pa apuba osangji pai phone ajanga Pequinot nem metetdakja liasü.

Roberts-i, Restoration Church nung züngsemtemji aika bendangertem lir, anungji züngsemtema ICE-i aputsü südi ta bilema tsübuteper, ta metetdaksü.

Roberts-i, "Pai pa melungjang ajak agi Kibuba meimer. Pai manga-a meyrutsütsü. Ni iba ozüng angateta lir, anungji ni ICE nem tai metongloksür, kechiyong ICE-i parnok teinyaktsü tim inyaker. Parnoki sorkar tetuyuba kübok inyaker," ta ashi.

Roberts-isa, Tshimankinda mapuyonga iba ken o latettsü atema court-i anogo ka lateter jaokba tajungba süla, ta ashi.

ICE otongdar, James Covington-i, Trump administration aser Department of Homeland Security Secretary Kristi Noem tetuyuba nung pa apu, ta metetdaksü.

Taküm küm tetenzüklen Evangelical lenirtemi, US Tir Donald Trump indang inyakyim kübok US nung aliba Arogotem aika kongshitsü, talisa bendanger jenti aliba Arogotem mejungi kongshitsü, ta metetdakja liasü.

Tawa Maryland kübok Eastern Shore nunga pastor ka apuba sülen hopta asem shi lir chiokogo. Iglesia del Nazareno Jesus Te Ama Arogo nung pastor, Daniel Fuentes Espinal July 21 nü apuba sülen August ita nung ang chioka liasü.

Pastor Fuentes Espinal-i, pa tepuokdak aliba mapang nung pai tepuokdak nisung aika den Khrista osangtajung lemsatepogo, aser aikati Khrista agizükogo, ta metetdaksü.

May ita nunga Florida nung ICE-i pastor Maurilio Ambrocio pua liasü aser June ita nung Guatemala-i anir ao. Pa densema Guatemalan nunger 100 shi New Orleans nungi tayimtsü ka ajanga anir otsüogo.

AO OSHI ANGAZÜKDAK:**TANÜ ANGAZÜKTSÜBA OJANG****Tesüsü**

(adj) tapak temedem, tesepra masü (smooth)

* Menden tesüsü nung sü lemer amen.

Tesütatem

(adj) tatembang nung, tesüsa (lastly)

* Tetsütatem nung tambusangi sarasademer senshi.



Tir Yimyim

OLONG PAITEP # 7252

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzük
10. Tasola
11. S _____
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

LANGTSÜNGLEN


1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. ____ hi
16. Akümüli nungi pilar

OLONG PAITEP # 7251 TELANGZÜBA**TIPIEN :**

1. Telok, 4. Aluru, 6. Ozüing,
8. Emk, 9. Kin, 10. Teti, 12. Süir,
13. Jen, 14. Ola, 16. Talak,
17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER MA

Lock aser key system tejentibaji Egyptian wooden pin lock ya asütsü, koba küm 4000 tejakdang amshia liasü. Iba lock and key system ya Egypt aser Mesopotamia nung ngutetogo. Parnoki kishi shibanga ayutsü atema pin-and-tumbler mechanism amshia liasü.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüing :
2. Tasoba anogo :
3. Küm : 4. Class :
5. School :
6. Talidak :
7. Salem osang :

Dampa bypoll atema ZPM-i kentener Vanlalsailova shim**Vanlalsailova****Aizawl, Luroi/August 26**

(Agencies): Zoram People's Movement (ZPM)-i Mizoram nung Dampa constituency bypoll atema nungtugu Mizo nung kentener Vanlalsailova party candidate asütsü shimogo.

Election Commission-i bypoll atema tang tashi osang sangdonga mali, saka ZPM-i party candidate sangdongogo.

Mizoram anüolen Mamit district nung Dampa menden ya Mizo National Front (MNF) legislator Lalrintluanga Sailo July 21 nü asüba sülen tazüing lir.

ZPM tir Lalliansawta-i Hombarnü Aizawl nung party sentong ka agiba mapang Vanlalsailova ya Dampa bypoll atema party candidate asütsü ta

sangdonga liasü.

Vanlalsailova nominate asüba atema tenüingsang agütsüba mapang ZPM tir-i, party kübok telen balala nung inyakertem dang taruba bypoll nung ajak longjemer inyaktsü mepeshia liasü.

Vanlalsailova ya 2023 küm November ita taoba assembly election nung toktep saka pai Lalrintluanga Sailo makok.

Sentong nung o jembiba mapang Mizo gospel kentener, shiba Dampa constituency kübok West Phaileng nungi lir, pai Dampa terenlok atema inyaktsü asoshi tulusang Tsüingremi pa nem maongka tanaben agütsüogo, ta ashi.

Vanlalsailova-i constituency nung aliba nüburtem dang pa atema vote asütsütsü mepeshiba den, terenlok bener arutsü atema ruling tsütsü adentsü koda tongtibang iba indang lemsatapa liasü.

Tanga political party temi tang tashi candidate sangdonga mali.

Assam Police-i Dashami Duara asüba ken o CID nem agütsüogo**Guwahati, Luroi/August 26**

(Agencies): Arishi küm 24 tain forest worker Dashami Duara asüba ken o nung temelenshi ka adoka Assam Police-i Mongolbarnü sangdong ka ajang ashiba agi pamoki iba ken o maneni bushisüngdangtsü atema Criminal Investigation Department (CID) nem agütsüogo.

Police-i X handle ajanga, "Dashami Dowarah asüba dak sendakba nung Bokakhat PS Case No. 94/2025 kanga junga bushisüngdangtsü atema CID Assam nem agütsüogo. - DGP Assam Police," ta metetdaksü.

Ketdangsürtemi Dashami ya Eastern Assam Wildlife Division-i yok, kong la August 7 nü Kaziranga DFO residential complex kübok lar quarter nung

sür lia ngutet.

Police aser forest department-i mezüingbo la soseta asü ta sangdong, saka iba tesem nung alirtem aser activist temi iba ya magizüki ken o kanga junga bushisüngdangtsü takhangba agüja liasü.

Ib tatalokba sülen state ajunga nung nüburtemi longkak aita liasü. Ken o nung aija aliba ketdangsürtem kümzüka ayuba aser yimdaklirtem dang dang ken o ashishiba atema nüburtem tali mepelai aküm.

Tai Ahom Students' Union aser Chutia student groups densema lokti tentet aikati Kaziranga DFO Arun Vignesh mapa nungi suspend sütsütsü akhang aser bushisüngdangertem dang

bushisüngdang nung pa-a bendenloksü mepeshia liasü. Parnoki ashiba agi, ketdangsür tejentem dang ken o masüngdangi ochiji kechi aji mejangjatsü.

Social media nung activist Abinash Axom-i ken o meshidak aliba indang zülua liasü. "Iba ya soseta asüba ken o masü saka nisung tepsetba ken o lir. Asenoki blackmail asüba aser ketdangsür kati teka sangshiba dena mezütoktsüla," ta ashi.

Ketdangsürtemi forensic details sota ayuba sülen state nung aliba nüburtemi temulung melemi bilemba tali aküm.

Activist temi CID-i iba ken o agizükba ya nüburtemi nongshiba ajanga lir, ta ashi.

Assam Police-i sen crore 3 alang codeine apu**Guwahati, Luroi/August 26**

(Agencies): Assam Police-i Assam-Tripura arrtsü len Karimganj district kübok Churaibari check post nung sen crore 3 alang Codeine Phosphate bottle 30,420 puogo.

Hombarnü meita aoba sentong benoka inyakba mapang temesepba mozü shibelener ana pua liasü, aser iba ajanga temesepba mozü anema state rara aliba nung teyari agütsüogo.

Itangitertem nungi osang angazükba sülen Sri Bhumi Police-i Tripura-i oya aliba truck ka kanga junga bushisüngdang aser iba mapang ozüing alema shibelener oya aliba temesepba mozü mima bener lia nguteta liasü.

"Temesepba mozü shibelenba tezü raksatsütsü atema onok bendanga agütsür inyakba iba meita aoba sentong



ajanga tali jangjashitsür," ta police ketdangsür tejen kati ashi.

Assam Chief Minister Himanta Biswa Sarma-i X ajanga tenüingsang agüja liasü. "@assampolice-i Churaibari check post nung sen crore 3 alang Codeine Phosphate bottle 30,420 puogo. Temesepba mozü shibelener ana tepuokdak lir. Temeseoba mozü anema jenjang tajung agiogo! #AssamAgainstDrugs." ta CM-

i zülutsü.

Churaibari check post ya Karimganj district nung kanga tongtibang checkpoint ka lir, aser iba tesem nung temesepba mozü aika pua arudar. Taoba mapanga codeine aketba syrup 44,100 aser 95,360 bottle pua liasü.

"Onoki temesepba mozü shibelenertem anema maneni jenjang agütsü," ta ketdangsür tejen kati ashi.

Pakistan nung tzümetsüng adoktsü tetsübo nung nisung 24,000 ainshiogo

Islamabad, Luroi/August 26 (Agencies): India-i Pakistan dang "humanitarian grounds" nung tzümetsüng adoktsü tekum dangtsü shir anogo ka lir Punjab nung ketdangsür temi Indus, Chenab, Ravi aser Sutlej ayongtem anasa telemok nung aliba nisung 24,000 dak tema anizüker ogo, ta osangtem ajanga ashir.

Provincial Disaster Management Authority (PDMA) ajanga tzunglu tesashi aruba mechi ghonda 48 tsungta Punjab nung aliba ayongtem nung tzu timba ayimtsü ta tzümetzung tekum dangtsü sangdonga liasü.

Temeket tenem len tzunglu kanga sashia aruba ajanga item ayongtem nung tzümetzung adokba ngua Honibarnü nungi evacuation maparen tenzükogo, ta Rescue 1122 odongtar Farooq Ahmad-i ashi.

Tensa ya Sutlej River nung aliba Harike nung tesashiba liasü, kong temalen aser tsünglanglen ayong nung tzümetzung tesashi adok.

National Emergencies Operation Centre (NEOC)-ia anogo ishika tsungta Ravi ayong nung tzümetsüng adoktsü ta tekum dangtsü sangdonga liasü. Hombarnü Islamabad nung aliba Indian High Commission ajanga Pakistan indang Foreign Ministry den tzümetsüng dak sendakba osang lemsatep aser ibai mürek-müreka 'humanitarian grounds' nung inyakba lir ta ashi.

April ita Pahalgam nung kiralongrari amakba sülen 1960 Indus Waters Treaty kübok India-i Pakistan den osang lemsatepba anena lir.

Ajisüaka New Delhi-i tang tesüsa tzümetsüng arutsü tekum dangtsü osang Islamabad nem agütsüba ya iba treaty kübok inyaktsü shia aliba ama masü saka mürek-müreka "humanitarian grounds" nung lir ta osang ka ajanga ashi.

Pakistan den arütsüa aliba Jammu and Kashmir nung tzunglu kanga sashia aruba sülen iba osang ya agütsü, koba Punjab province nung ayimba

ayong tulutem nung yimoker. Tzunglu arutsü takzüba sülen Punjab Chief minister Maryam Nawaz-ia ayong anasa aliba nüburtem dang pei ki yutsür ainshitsü totuyuba agütsür lia iba tekum dangtsü ya ashi.

UN Office for the Coordination of Humanitarian Affairs (OCHA)-ia September ita tetenzüklen tzunglu tesashi arutsü akok ta tekum dangtsü ashi, anungji ano tzümetsüng tali adoktsü, alinen alutsü aser alu nung takoksa ajurutsü tensa ka nung lir.

Pakistan nung June nungi September ita tashi tzunglu aruba mapang ayongtem nung tzu tali yima alinen alur, ki o jen raksatsür aser nüburtem pei ki yutsür tesem balalai prokshir.

2022 küm tzümetsüng tesashi adokba ajanga nisung 1,700 takum sama, nisung million aika tesem balala nung jenshi aser rongsenketzung tsütsü sen \$40 billion jenjang takoksa ajurua liasü.

Kibuba tsübuba jagi arishi atsülanger. A. Shin 10:27
Küm 100 abensa-a arishi talang moatsüba atema
Tsüngrem nem tenüngsang agütsür.



Mrs. Atsüngrenla Ozükum (Mongsenyimti)

Temeim Oja, otsü, nai tila kümer ajemalua Tsüngrem dak amangba, aser Pa nem len anidaktsüba ajanga Tsüngremi nü nem arishi talang moatsüogo, aser na liyonga aruba mapang onoki kü dak tatishitsü tajung tangazükba talubosa ngudaki.

Anungji item ajak asoshi tanü nür chirnur, semchir aser kinüngertemi Tsüngrem nem tenüngsang aguja, aser na küm 101 nung ayaoka aodanga Tsüngremi len ania moajang ta sarasadema amonger.

~ Temeim Chirnur, Semchir aser Kinüngertem.

Sri Lanka taoba tir Wickremesinghe apuba mechi longkak aiter



Colombo, Luroi/August 26 (Agencies): Sri Lanka nung Ranil Wickremesinghe tir inyakba mapang nüburtem indang senotsü tim masüba nung amshi ta tai tonglokja pua aliba nem bail agütsütsü asü masü ta telemetba agitsü lia pa bhukumer nisung 1,000 dak tema Mongulbarnü Colombo nung adenshia longkak aita liasü.

Wickrenesinghe, shiba 2022 nungi 2024 tashi Sri Lanka tir inyaka liasü, pa ya 2023 nung sorkar nungdak asoshi United States semdangba sülen London nung pa kinungtsü graduation sentong nung adenba mapang nüburtem indang sen amshi ta tai tonglokja taoba Hokulbarnü apu. Court-i pa Mongulbarnü ken o mejembi tashi pua ayutsü totuyuba agütsü.

Wickremesinghe apuba ajanga nisung aika ola adok aser opposition nungi ozüng yanglurtem aser yimten yimsüsür temi ibai linük indang democracy loksatsütsü asoshi "political witch hunt" ka lir ta ashir.

Mongulbarnü pa bhukumer aser opposition activists tem longkak aittsü asoshi Magistrates' Court-i aoba

yimtung tongtiba nung adenshia liasü.

Longkak aiter kar süoshi sentsü tanak agir nisan tanak ayiptena liasü. Parnokisa pa apuba aija yimyim ayim aser "Tangsa taoba tir Ranil Wickremesinghe chiokang" ta züluba banners tem bener nokdaka liasü.

Taoba küm election nung nangzükba ama sorkari nübur nem mapa meinyaktsü, aser tang parnoki political opponents tem bushir, ta longkak aiter kati ashi.

"Wickremesinghe apuba onoki aitsür, shibai linük asoshi mapa tajung jenti inyakogo. Pa atema ochi obendang khanga onok yangi adenshi," ta pai ashi.

Transport and Highways Minister Bimal Rathnayake-ibo sorkar dak tai tongloksüba magizük aser Wickremesinghe apuba ya yimtenren nung mangyangba masü saka linük indang ozüng ama inyaker ta ashi. Tesüba sorkar tem nung tim masüba inyak ta tai tonglokja aliba bushisüngdangtsü sorkar telemetba lir aser ozüng ya sako amshitsü, ta pai Hombarnü osangbener dang ashi.

Taoba küm anti-corruption platform nungi tir akumsang

Anura Kumara Dissanayake kübok Sri Lanka indang taoba tir apuba aser tejangjatiba lenir ka bushisüngdangbaji Wickremesinghe ya mezüngbuba alitsü.

Mapa meshidak inyak ta tai tonglokja tang Sri Lanka nung taoba sorkar ketdangsür aser yimten yimsüsür ter dak tema bushisüngdangba mapang lir.

Wickremesinghe'er party-ibo pa menden nung ajemdaker jaokba ama iba graduation sentong nung aden ta ashir.

Wickremesinghe ya tang Colombo National Hospital indang Intensive Care Unit nung temang anepaluba mapang lir aser pa Mongulbarnü okadaki marutsü akok, ta prison odongtar kati ashi.

Ajisüaka pa court den virtual ajanga sendakteptsü achayanga lir ta ashi.

Wickremesinghe ya dehydration aser iba dak sendakba timtem kar ajanga Honibarnü Colombo National Hospital nung aniok. Pa temang tajungba lir saka doctor telok kati ICU nung kanga junga anepalutsü nungdaker ta shia lir, ta iba mozüki indang director Dr. Pradeep Wijesinghe-i Hombarnü ashi.

Mulungnen O

ASO 28-10-1950 ASÜ 16-08-2025

KIKACHILA

Onoki teti meimla Ojala Kikachila (Ungma), Kumlong Ward. La shirang yipten nung alidang nungi akümlü wadang tembanga aruba anogo aser asü lepkhü maparen ajak tembanga rongsen, nübu aser sarasadem agi yariteper kija kibong, kiyonger, lokti balala aser Arogo ajak dang ozü mulung taroktiba nungi pelaba lemsateper. Nenok mapa tajung Tsüngremi moajang ta ozüi sarasademer.

Temeim Kinungbu, Chirnutem aser Kinungertem.

Asaa civilian dak tenük yoker amakba masü: IDF

Jerusalem, Luroi/August 26

(Agencies): Gaza south tsütsü Khan Younis nung aliba mozüki ka nung anaben amakba nung nisung 20 tepset aser Israel Defence Forces (IDF) ajanga Hombarnü sangdong ka nung parnoki civilian dak asaa tenük yoker amakba masü ta jangjatsü aser küm ana jungnüa rara aliba nungya Hamas-i "impossible conditions" adokdaksür ta tenüng asen.

Hamas temi mozüki ama civilian ki o jen jong ama amshir, aser civilian tem lendong nung yutsür ta IDF-i tai tongloksü. Taoba mapang Hamas tem Nasser Hospital nungi inyaksangshia liasü ta parnoki ashi.

"Hamas-i iba rara ya tenzük, raratsü asoshi tamakoktsü tensa yanglutsür aser tang tashi asen hostage 50 mechioki iba rara metembangdaksür," ta IDF ketdangsür temi X nung video ka nung ashi.

Bushisüngdang tenzükogo aser rara nung shilem magiba nisungtem dak kongshiba asoshi sasar aser yamaji osangbener dak tenük meyok, ta ashi.

Iba mozüki nung osangbener pongu densema nisung 20 tepsetba asoshi Israel Ato Kilonser Benjamin Netanyahu-i sasaba osang ka Hombarnü lemsatep.


"Tanü Gaza nung aliba Nasser Hospital nung kodamasü timtem atalokba atema Israel kanga sasar. Israel-i osangbener, medical staff aser civilian ajunga züngshir," ta pa indang office ajanga sangdong ka nung ashi. Iba mozüki nung Israel-i anaben amakdang Reuters, Associated Press aser Al Jazeera osangbener densema asü.

News agency aseme osangbener asüba mangyim sangdong agüja liasü.

Israel aser Hamas tsungta küm ana jungnüa raraba mapang osangbener 200 shi tepsetogo, ta AFP ajanga ashir.

Civil defence indang odongtar Mahmud Bassal-i ashiba agi, Israel indang explosive drone yagi mozüki nung aliba ki ka nung kongshi aser iba lendong nung yirur alirtem anizüker aoba mapang tayimtsü amshia amak.

Asian Shooting C'ships: Sift Kaur-i kija aser team gold medal angu



Luroi/August 26, 2025 (Agencies): Mongolbarnü Asian Shooting Championships nung Sift Kaur Samra-i tetsür 50m rifle 3 positions kija asaya aser team asaya nung gold medal ana nguogo.

Kija asaya nung Sift-i point 459.2 ngua lai China tsür Yujie Yang (458.8) aser Japan tsür Misaki Nobata (448.2) ajateta gold medal nguogo.

Asaya ti asayaba final nung India tsür Ashi Chouksey-a asaya saka lai point 402.8 dang nguteta la tenetbuba nung tembang.

Qualification round nung Sift aser Ashi na tanabuba aser pongububa nung liasü. Ajisüaka final-i aidangbo tena mezüngbuba aser pezübuba

nung liasü. India tsürsa Shriyanka Sadandi-a iba asaya nung asaya saka la 'Ranking Points Only' (RPO) category nung asaya liasü. Qualification nungbo la temaba jenjang nung liasü.

Kasa mapang nung Sift, Ashi aser Anjum Moudgil nungeri 50m rifle 3 positions team event nunga gold medal nguogo. Sift-i point 589 angu aser Ashi o Anjum nati point 586 aser 578 ngua par asem senteper point 1753 ngua gold medal angu. Iba asaya nung Japan (1750) aser South Korea (1745) nati silver aser bronze medal angu.

Hombarnü Neeru Dhandia gold medal ana nguogo. Lai women's trap title aben aser

iba sülen Aashima Ahlawat aser Preeti Rajak na den longjemer team asaya nung gold medal ngua liasü.

Tebur trap asaya nung Bhowneesh Mendiratta-ia silver medal ka nguogo. Pai China nunger asayar Qi Ying memenep. Kasa asaya nung China nungersa Chen Pengyu-i bronze medal angu.

Tang tashi nung India team-i gold teku, silver asem aser bronze medal tenet ngua lir. Asian Shooting Championships nung India nunger asayar 35 asaya 15 nung medal atema asaydar. Kasa mapang nung Shymkent meet nung India nunger asayar 129 junior events nung toktepdar.

Leeds-i Leicester full-back Justin alizükogo



Luroi/August 26, 2025 (Agencies): Leeds United-i Leicester City defender James Justin pound million 10 agi alizükogo.

Full-back asayar yagi Leeds den küm pezü atema tenangzüktepba yangluogo aser pa ya club-i tang transfer window nung alizükba asayar terbuba kümogo.

Leeds-i arishi küm 27 tain asayar atema ya Leicester nem pound million 8 aser add-ons pound million 2 agütsüsü.

Justin ya Carabao Cup tanabuba round nung Sheffield den asayatsü aliba asaya

nungbo masayatsü saka pa Honibarnü Newcastle den Premier League asaya nungbo asayatsü.

Luton Town nungi asaya-a career tenzükba sülen Justin ya 2019 küm Leicester City nung aden aser pai asaya 169 nung goal 11 idakja liasü. Right-back asayar yagi left-back nunga asayateter.

Leicester nungi asayaba mapang pai 2021 küm FA Cup kokogo aser 2024 küm Championship title bena liasü. Pa England team nungia 2022 küm Uefa Nations League nung Hungary den asaya liasü.

"Iba amala club tulu ka nung dena tanaben Premier League asayatsü maongka anguba atema ni kanga pelar," ta James-i ashi.

Summer transfer window meshibang tsüngda team akangshitsü atema Leeds pur inyakdar aser parnoki taoba hopta AC Milan nungi forward Noah Okafor pound million 18 agi alizükogo.

Tang transfer window nung parnoki alizükba asayartem rongnung England striker Dominic Calvert-Lewin, midfielders Anton Stach aser Sean Longstaff, Brazil nunger keeper Lucas Perri, Sweden left-back Gabriel Gudmundsson aser Udinese nungi centre-back Jaka Bijol, Centre-back Sebastiaan Bornauw aser forward Lukas Nmecha nunger densema lir.

Kasa mapang nung Leicester pur taoba season Premier League nungi relegate asüba sülen Conor Coady, Wilfred Ndidi, Mads Hermansen aser Kasey McAteer nungeri club toktsüogo. Justin densema item asayartem ya pound million 50 shi agi yokogo.

Hockey Asia Cup 2025 angati agi reprangdaksütsü

Luroi/August 26, 2025 (Agencies): Hockey India-i Mongolbarnü sangdong ka ajanga Asia Cup reprangsü atema fan tem angati idaksütsü ta metetdaksüogo. Iba asayamug ya August 29 nü tenzüksü.

"Asayar reprangi arurtem kecha timtem aser tetsükdaksü makai venue telungi idaksütsü atema iba inyakyim ya benokogo," ta Hockey India-isa metetdaksü.

Taküm tebur Asia Cup nung Asia nung temaba jenjang nung aliba team ti tokteptsü. Team tem rongnung India, Japan, China, Kazakhstan, Malaysia, Korea, Bangladesh, aser Chinese Taipei densema lir.

Iba asayamug ya ano 2026 FIH Hockey World Cup atema qualifier ka lir, anungji team ajak asoshi kanga tongtumbang asayamug ka asütsü.

Asayamug ayongzüka asayaba India team Pool A nung Japan, China, aser Kazakhstan den ata lir. Parnok mezüngbuba

asaya China den August 29 nü asayatsü aser iba sülen Japan den August 31 nü aser pool nung tatembangbuba asaya Kazakhstan den September 1 nü asayatsü.

Fan temi angati ticket atema www.ticketgenie.in mesüra Hockey India app semdangtetsü, kong inyakyim tembanga inyakba sülen virtual ticket ka agütsüsü.

Men's Asia Cup 2025 atema Indian Hockey Team:

Goalkeepers: Krishan B Pathak, Suraj Karkera

Defenders: Sumit, Jarmanpreet Singh, Sanjay, Harmanpreet Singh, Amit Rohidas, Jugraj Singh

Midfielders: Rajinder Singh, Raj Kumar Pal, Hardik Singh, Manpreet Singh, Vivek Sagar Prasad

Forwards: Mandeep Singh, Shilanand Lakra, Abhishek, Sukhjeet Singh, Dilpreet Singh

Alternate Athletes: Nilam Sanjeep Xess, Selvam Karthi.

US Open: Alcaraz aser Wong nati takok angu



Luroi/August 26, 2025 (Agencies): Tang asaya aliba US Open tebur kija asaya nung Carlos Alcaraz-i Hombarnü Reilly Opelka koka tanabuba round-i iogo.

Iba asaya ya arishi küm 22 tain Spain nunger asayar yagi 6-4, 7-5, 6-4 agi ayong ayonga koka tanabuba round tongtetogo.

"Tanü asaya melara masü asü," ta Alcaraz-i ashi.

"Reilly ya asayar tajung ka lir. Ni aginüba ama rhythm mongutet saka ni tanü kechi koma asayatetogo iba dak kanga temulung asür. Ni tanü kanga junga asayaogo," ta pai shisem.

Alcaraz, shibai US Open nung mezüngbuba asaya 2022 küm koka liasü pai mezüngbuba set nung game pongububa nung Opelka indang serve break süa pai asaya koka liasü.

Tanabuba set nung Opelka

indang break point ana kümzüka 3-3 akümba sülen Alcaraz-i game 11buba nung serve ka break asü aser 6-5 agi tejakdang akümba sülen asaya koka liasü.

Tasembuba set nunga game tekububa nung Alcaraz-i Opelka indang serve break asü aser pai asaya 6-4 agi akok.

Pa tanabuba round nung Italy nunger asayar Mattia Bellucci den asayatsü.

Kasa asayamug nung Coleman Wong-i otsü tasen ka yanglua pa Open era nung Grand Slam kija asaya ka akokba Hong Kong nunger mezüngbuba asayar kümogo. Pai Aleksandar Kovacevic straight-sets nung koka liasü.

Arishi küm 21 tain Wong-i qualifier nung takok tajung ngua asayaba sülen pai mezüngbuba round nung 6-4, 7-5, 7-6 (7/4) agi Aleksandar madak takok ngua liasü.

BILEMDANGANG

"Anema linüra temang arakzúa inyaksangshiang."